

【老葉壯新枝旺】劉玉蕉原作

係風个撩弄，抑係魚在水竇洩，探出水面澄澄企个蓮花枝莖，寬寬起舞咧，佢定定搖擺高溜个枝莖，頂高个大皮葉，斯像掀書个樣，一葉貶過一葉！等歸夜正盛來个鑽石，跔緊一粒一粒碾落窟肚，水竇个魚陣，遽遽撻來鋪在水面个荷葉，趕過來承，承著咧，閃光个鑽石還係錫人个金皙皙，輪落¹窟肚水竇个斯變做魚陣个涼水。

一窟水，毋係陂塘毋係湖，原旦係大雪山林業公司圍水浸樹筒圈个所在，林業沒落了後，這窟水係死水，係荒撇个濫泥。年視年，任佢野草莽生²，蟲、蛎在窟肚樂暢唱歌。荒廢多年都無人蟻確³，係哪日起勢，毋知哪個天才，在濫泥个一角，試試種落希望，麼人會想著正幾年，斯遛去歸窟咧！到這下，歸大片个蓮花，年年在熱燻燻个天時接緊上場，厥个嬌、厥个羞，圍在花苞肚，一伸出水面斯惹人愛憐！天甫光露水言散，該像新嫁娘樣个蓮花斯恬恬開花，點過胭脂个面容，慢慢開展、開展，澄線个肢

¹ 碾落：音 zan` log`；滾入。

² 莽生：音 mang` sang`；雜亂生長。

³ 蟻確：音 she` doi`；搭理。

骨、淡淡个清香，錫來蜂蝶、招來讚嘆个話語，等靚過咧花謝落濫泥，硬頸个枝莖還係承載守顧个任務，頂高个蓮蓬係胞衣，蓮子係嬰兒，蓮子言熟進前，佢堅心⁴守顧，直直到蓮子唸出、碾落窟肚生根暴牙，佢正功成身退、企死⁵濫泥肚。

涼爽个東勢、人文个山城，因致這萬般風情个蓮花生態水窟，還過毋係森林嘎有同森林共級數个園區，這幾年錫來毋會少个外地客來賞花、遊寮。如今，東勢林業文化園區係有名个休閒、賞蓮花景點。打早，風涼涼，跔窟脣个步道隨在你大步行，定定行，樟樹、茄苳、柿樹……會替你遮蔭，樹頂高个蟬，唱歌同你相隨，班鳩咕咕係伴奏，水窟个水無已清，映毋出白雲个悠閒，嘎顛倒分好事个魚陣攏去汶汶，水面揚尾迂來迂去，毋會暈山也毋會撞壁。風涼涼、心清清坐在窟脣石面，毋多知，一坐斯半朝脣。

目珠旅行心散步，在這生態池你看著个係蓮花个一生，心恁想个係恁人个一生，同這靚靚个蓮花共樣，生命个起點同結束大人都共款，落腳所在孤孤決定肢骨係毋係砸礮，濫泥肚个蓮藕佢會尋肥泥鑽，共樣開出清淨个大蕊靚花，恁人也共樣，出路斯在面前，胸脯挺起來，大步踏出去，屬於若个靚花也跔緊斯會開！

⁴ 堅心：音 gien+ sim+；時時刻刻無微不至。

⁵ 企死：音 ki+ si^；直立的植物自然死亡。

【屋面前个細埕】張美容原作

佢這下戴个屋，面前有一埕細細埕个空地，毋知愛仰脣來喊佢，講佢係禾埕，又毋罅大；講佢係花園，種个又毋成花，吾等斯儘採同佢安做「屋面前个細埕」。

這個細埕進前為著細人做一個假山、作一個魚塘，過後，因為魚總係在半夜分貓公食撒，斯做下廢撒，換種花。這下，無細水沖對假山山頭拚往落个水聲，乜無成半下、成半下魚躑尾¹个聲咧，恍著屋家會變都恬芍芍、無聲無說。無想著，花種落去一站，細埕嘎還較鬧熱，除了相爭開、色目²多樣个草花以外，還有蜂來採花蜜；蝶、揚尾來跳舞、搞柶；連瓦雀、白頭傑都來鬥鬧熱，比比企在欄杆頂唱歌，較過分个係，唱柶咧，嘎用佢當當開个蝴蝶蘭做點心，佢毋盼得蘭花，想愛同厥等逐走，毋過，想著人用花入菜逐儕都講高雅，仰脣孤孤愛怪怨鳥食花呢！心肝一軟，斯由在佢咧！

種啊種，細埕个花加加掣有四十外盆咧，有耐命个日日春，

毋知哪久、毋知哪位飛來个花籽，玄玄風在水溝脣、牆頭角鑽出來，有兜還大般大般³占⁴別人个地盤，厥等賤罔賤，逐日當煞猛打扮這個細埕，係模範勞工哦！埕肚个皇后，算來斯係該盆玃⁵都像大腳盆恁大个石榴花⁶咧，開花時節，滿樹看毋著葉，做下係茄紅色惹目⁷个花，過路个人看著都嘖嘖滾安謐。分佢安做公主个係大盆肚个櫻花，逐蕊花个花瓣⁸重重疊疊，雪白裡肚摻兜水紅，高貴嬌美，實在錫人。成十盆个蝴蝶蘭斯係貴婦咧，著緊紅色、白色、黃色个裙，跔春風搖搖攞攞，姿態優美。係愛尋一個皇帝，定著斯係該盆比佢較高个「尤加樹」咧，佢企在窗門脣，略略躬身看緊厥个子民，像人在該吩咐講：「煞猛哦，煞猛同自家過來精彩！」花、草有情，總係用一樹个燦爛同清香來回應⁹佢。

春夏秋冬四時運轉，細埕个花乜跔緊四季開開謝謝，見看著歸地泥个落花，心肝斯當艱苦，久久毋盼得掃撒。恁多年來，佢學會接受咧，這季个花下棚，佢會放開心情，同佢講：「明年見囉！」續緊又會有另外一種花跳上舞臺，這個「屋面前个細埕」自從都毋識分佢失望！

³ 大般大般：音 tai` ban+ tai` ban+；大方神氣的樣子。

⁴ 占：音 ziam`；佔據。

⁵ 玃：音 pia+；向兩側散開。

⁶ 石榴花：音 shag` liu` fa+；海陸腔指「杜鵑花」。

⁷ 惹目：音 ngia+ mug^；耀眼。

⁸ 花瓣：音 fa+ pan`；花瓣。

⁹ 回應：音 fui` rhin`；回答。

¹ 躑尾：音 bad` mui+；擺動尾巴。

² 色目：音 sed` mug`；色澤、顏色。

【做伴行一截路】彭瑞珠原作

該日，偈坐比平常時早一枋个火車去上班，時間還早，偈斯心情輕鬆、涼樂涼樂¹行。正行出捷運站，斯聽著背後砰²兩聲，已大聲。偈斡頭看下，一個生來已高大又派頭、目珠看毋著个細阿哥，對緊捷運站个門脣行過去，連撞兩到。吾心肝肚恤：「厥屋家人呢？」踅緊，斯聽著一個婦人家對佢喊講：「先生！左片！」細阿哥聽啊著，帶緊笑容直直退兩大步，又帶緊燦爛个笑容行出來。

偈讓佢過，分厥等先行，毋過，出聲个婦人家早都行遠咧，原來，佢係一個過路人忒等。好得，偈看著一個比扶手較高一層个細阿妹、揸緊書包等在電扶梯頭前咧。細阿妹等細阿哥行過去，探頭同佢軟聲講幾句話，斯拉緊厥正手个衫袖，共下行上電扶梯、行出大路。

該日个天時已好，雖然風還略略會寒人，毋過，日頭拗蠻燒暖。純真粉色个細阿妹揪緊高大斯文个細阿哥衫袖，行在闊闊个

紅磚路項，兩個人有講有笑、腳步定貼。偈行在厥等个後背，試著四圍个空氣、風景都變好、變靚咧，連平常時偈總係嫌佢歪歪孬孬又虐虐削削³个路樹，看來都較清秀咧。

在岔路口，三年生个細阿妹堵著一個熟事、愛去買菜个老人家，斯共下過大路，去學校咧。偈正想著，難怪，頭先細阿哥个正手全無出力，一來，係為著愛配合細阿妹个高度；二來，係因為，厥等七係正在路項相識个人忒等啊！

細阿哥大步大步繼續行，偈半行半走在後背踅，掌緊佢過大路、掌緊佢行到頭前个辦公大樓過後，偈正斡入巷肚去。偈全毋識厥等，毋過，厥等該日个身影、腳步同笑容，做下留在吾个腦膈裡肚。

人生路項，有已多識同僇等做伴行過一截路个人，有短短照面或者全無相識，斯各人做各人行个過路人；也有共下行已長路个朋友、親人。偈想，使得做伴共下行个人，做下係有緣分个人啊！

¹ 涼樂涼樂：音 liong^ˇ log^ˋ liong^ˇ log^ˋ；步調輕鬆的。

² 砰：音 bong^ˋ；狀聲詞，撞擊聲。

³ 虐虐削削：音 ngiog^ˆ ngiog^ˆ siog^ˆ siog^ˆ；指看了令人不舒服。

110 年全國語文競賽客家語朗讀文章社會組（大埔腔）

編號 4 號

【收字紙】溫筆明原作

滿腹心事熔爐火，萬丈煙光射斗牛，佢試著這係哪家人个門聯，朋友笑佢毋係眼媿媿斯係無讀書，又係煙光又係爐火个講法明明斯係惜字亭，正會滿腹心事送化存神，原來，敬字文化个根還在，比起金爐燒金个祈求還較高段數，愛深深佩服莊項先輩个智慧，曉得教人敬字惜字个聰明，還留有恁多惜字亭斯係鐵打个事實。

記得，四、五十年前有人發願揸字紙籠收字紙，像武俠小說肚个人物恁泥，著緊闊闊禮禮个衫褲，一雙平底烏布鞋，戴一頂笠嫲，用八尺長个竹棍來揸擔，揸緊會同人平高个字紙籠，籠項用紅紙黑字寫核「敬惜字紙」、「尊古聖賢」，逐個月固定兩個時間出來奉公，像苦行僧个樣，一步一腳跡，對莊頭行到莊尾，一家一家收，連寺廟佛堂都無漏撇，甚至會用柑糖錫細人配合，來達到敬惜字紙个目標，收滄咧毋係揸去銀行換紙票，係三國歸司馬懿，做下揸去繳分惜字亭，先請祝融將軍一一火化清點，過請制字先師倉頡聖人監納，誠心敬意收字紙，送化存神一條心，顯現出愛惜字墨尊敬聖賢个本心，年復一年自從毋識推懶過，該

種精神實在分人敬服。

借問一下，今這下還有看著這種人格个人無？正經斯像講古个樣，愛過尋著這種畫面該斯難字一隻，怪斯愛怪時代變化恁大，對單純个農業社會變做競爭激烈个工商社會，收字紙个工作分資源回收个口號回收走咧，名句教育普及，敬惜字紙个文化嘎跔西洋化个大水流走咧，惜字亭本本還企在該位項，風來風吹雨來雨打，還過日頭來日頭炙，可能也有當多个無奈，失撇往日燒化字紙个光彩，有兜寂寞也有已大个失落，毋過，準講，政府肯牽頭帶路，將收字紙个文化重新揸金看板，重新發揚該種精神，甚至列入重要文化遺產，好好傳承落去。

收字紙收个毋單淨係字紙，收个係一種淨淨个心靈，收个係一種使毋得跌撇个風範，收个係千金難換个文化資產，值得大家人共下來重視。

110 年全國語文競賽客家語朗讀文章社會組（大埔腔）

編號 5 號

【雲林·他鄉·家鄉】李碧圓原作

雲林係雲動風輕个好所在，農業首都逐儕知，戴有一陣詔安客，蒔田掖菜種西瓜，畜豬畜雞畜奶牛，改良菜種、農作技術，增加產量，提供全國安全品質个農牧產品，分大家食著康健好味瑞。

有閒定著愛來雲林行一掖，火車坐到斗六站，正過盤客運到各所在去，高鐵舒適速度遽，雲林虎尾站，請你定著愛落車，駛車也當利便，斗六、西螺、虎尾交流道，路闊大條有標誌，分你人行到哪位都知路，來買西螺豆油搵雞肉。二崙西瓜甜又沙，崙背香瓜甜滋滋¹、香噴噴，想著口涎水斯流無停。看著一坵一坵青色个禾田，風吹來，像靚靚个青色海波，菜園肚一廂一廂个青菜，係人同土地个結合，來食一碗吾等个菜頭豬肉湯，糯米炊个紅龜粿、甜粿，同煎去香香赤赤个菜頭粿，試嚐下看詔安客个好食物，分你一食斯會討尾。

西螺大橋有 2000 公尺長，在橋面吊望濁水溪靚靚个景色，臺灣、日本、美國共下來建設；振興書院係盡高等个學府，晴耕雨

讀个所在；巴洛克建築代表老街久遠有年代；崇遠堂張廖个家廟，春秋兩祭代代子孫誠心來祭拜，生廖死張萬代傳，尋幽訪古，西螺老鎮古蹟多。

二崙故事屋較早係派出所，這下逐日在講古，講過去講未來，愛聽客莊个風俗請你定著愛來做人客；第一舞稻館「一粒米个故事」聽了會感心，瞭解一粒一粒白米个珍貴，行去腳軟咧，請跋上二樓歇睏啲咖啡，環境清幽過素絲；崙背千巧谷「回家个牛」帶你啲牛奶、食麵包、看水牛、看奶牛同鯉魚，鼻下牛个氣味，好看、好食又好奈；悠紙生活館有變奇術个紙，將貴紙廢料變做賞物、文具、傢具，哦！原來環保紙係一遍又一遍个利用，保護地球大家共下做。

詔安客家文化館，係吾等个公屋，有展覽、有講解、有活動，講吾等祖公仰脣來，吾等祖公又係仰脣同荒地變良田，講鍾廖李三姓祖先同吾等个關係，在這位講分你聽。

祖先个他鄉，現子時係吾等个家鄉，三百年來，繼承前人智慧，記得先人个祖訓「寧賣祖宗田，不忘祖宗言，寧賣祖宗坑，不忘祖宗聲」詔安客話，吾等世世代代永流傳。

¹ 甜滋滋：音 tiam^ˇ zi^ˇ zi^ˇ；非常的甜。

【 陪伴 】曾菁怡原作

春光明媚，日頭花輕手輕腳對葉縫鑽過，掖落一地个金黃。樹樞踮風輕輕搖擺¹，像同偲等攞手，花開鳥唱歌，恁好个天時莫打爽，這係散步个好時節。

偲轉身看你，期待你有同偲共樣个想法。坐在桌脣个你，還目金金看緊食朝過後个碗筷，嘴糜啊糜，係回想食過麼个？還係回想食過言？故下大氣，偲行到若脣項跔落來，拈撇若嘴角个一粒飯糝，低言細語講：「偲等來去散步咧。」

雖然日頭帶來一層層燒暖，毋過早春个風還係清冷清冷。偲對壁項个衫鉤將若茄色个氈帽同大紅外衫拿落來，細心細意同若帽戴正、外衫著好勢，鈕一粒一粒鈕好，上上下下同你巡過一擺，確定你著燒咧、定貼咧，正牽緊你出門。大門「咿—呀—」打開，朝脣个日頭既經鋪好金色个地毯等偲咧！

細漢該時，同你手牽手散步係偲盡幸福个時間，你牽偲行過街頭巷尾，樹頂啾啾滾个喊做伯勞，惡擎擎會逐人个係阿啾箭，還有牛牯盡惱著紅衫个人，吩咐偲絕對愛細義；上店有戴目鏡个

係頭家，逐擺都好心分偲等賒數，因致看著佢愛好禮相借問；屋前綯一隻肥律律²黃狗个係阿蘭姨厥屋家，佢係阿姆盡細个老妹，煞猛又溫柔，畜豬割草樣樣會。偲等一路行一路打嘴鼓，若手巴掌个溫暖、朗朗个笑聲深深刻在吾記憶裡肚。

這下，偲等行在共樣个街頭路尾，你講行到這頭樹下愛細義，該隻牛牯當歪哉³，輒輒都愛颯出來嚇人；你講上店到咧，愛去同頭家拆數，無會對佢敗勢；你講阿蘭刷一隻雞分你，喊你去厥屋家拿……偲恬恬聽，笑笑領頭，同若手牽核核，在心肝肚應你：該隻牛牯無田好耕，既經當久無綯在樹下咧；上店个頭家十外年前斯徙去臺北同厥俵戴咧；你掛心个阿蘭老妹大前年先去天頂同爺哀做伴咧。

燒暖个朝脣頭，兩子哀行在熟絡个街路，講天講地講過去，斯係無現下。時間个長河定定沖走若記憶城堡个一磚一瓦，毋過沖毋開偲同你牽核个手，沖毋散偲等共下做伴个幸福。

¹ 搖擺：音：rheuˋ rhagˋ；招搖。

² 肥律律：音 puiˋ ludˋ ludˋ；肥胖。

³ 歪哉：音 vai+ zai+；難駕馭。

【阿姆，毋係佢嘴豺啦】葉秋菊原作

還當記得在牛眼樹下跔緊大个童年，在該涼沁沁个樹下毋知編出幾多生趣又感動人个故事，陪緊佢長大成人。

記得還細時屋脊迂迂沿，有幾下頭牛眼樹，樹身有頓兜頓兜葉披披¹个，也有溜抽溜抽²高天天个。厥等像輪班个樣間年打，今年打都噹噹吊吊³个，明年一粒魂影都無；舊年歇暈个今年時節一到，斯相賽開出黃疍黃疍、撈撈幼幼个花來，花開幾多，吾等个期待斯有幾高。

熱天到，牛眼還白核，吾這兜耆豺鬼斯巡上巡下，頭臥臥掌緊該一葩一葩墜落來還粗皮粗皮个牛眼，幾時正會熟水呢？等都無安無生⁴，乜愛等到七月半邊正有好拗。拗牛眼係童年个一齣大事，樹身直直吾等溜溜蹴⁵跋毋上，緊揪阿爸衫尾，嚙⁶佢拗分吾等食。阿爸手腳溜掠無論杈極多个抑係滑溜溜，佢都像膨尾鼠个

樣，兩下半斯攀躍上樹頂拗，吾等嘴開開等在樹下承，一下無承準，牛眼跌落地泥下朗朗散，吾等斯遽遽拈起來，一粒都毋盼得打爽。

等到佢較大兜有膽跋樹咧，斯透當晝毋驚日頭烈，毋驚青竹絲，不時跋上樹去拗幾葩轉來分大家食，阿姆嗶目瞋瞋緊睭佢：「仰恁豺嘴？係熱著仰結煞！」毋知阿姆到底係譴佢？抑係愁佢？直直到佢出事咧，正尋著答案！

該係七月半个臨暗，家家屋屋家普渡拜門口，屋家匱都局痢肚，祭品實在澀都衰過。探頭一看，樹頂有牛眼啊！著！佢毋聲毋氣，攞緊籃跋上牛眼樹頂去，該頭牛眼樹特別高，好拗个分人拗淨咧，伸樹尾頂个墜極⁷。佢手探長長，拚命也愛拗著來，盲知嗶憑斷燥樹極，對樹尾頂啲！啲！啲，穿過層層个樹極，尸肱頓落地泥下，佢跌去失魂，疾去唉唉滾連話都講毋出。

一身烏青揭血，尸肱頭腫都像碗恁大個，攞緊幾葩牛眼，腳跛啊跛行轉屋家。阿姆看佢一身係傷，開口斯罵：「斯係恁豺啦！」講撇厥目珠斯紅咧。「阿姆，毋係佢豺啦！係驚好兄弟嫌佢等無誠意啦！」哪有牛嫲毋惜子个呢？阿姆嘴硬心肝軟，係愁佢這個盤擎妹啦，該央時个佢，仰脣毋曉得體恤阿姆个用心呢？

恁多年過去咧，該牛眼樹下个往事到今還深深刻在吾腦膈肚，啊！童年生趣，親情無價啊！

¹ 披披：音 pia+ pia+；枝葉披垂。

² 溜抽：音 liu+ chiu+；修長。

³ 噹噹吊吊：音 dong` dong` diau` diau`；結實纍纍。

⁴ 無安無生：音 mo` on+ mo` sen+；喻坐立難安。

⁵ 溜溜蹴：音 liu` liu` cho`；一直滑下來。

⁶ 嚙：音 kiau`；吵著要求。

⁷ 墜極：音 chui` va+；低垂的樹枝。

【行醫一生人】黃美貞原作

公館愛去出礮坑¹个臺六線路脣，有一間日本式个屋舍，外壁係灰灰白白个洗石，屋面前有細花園，看來當有歷史咧，厥名安做「福基診所」，裡肚戴一個既經做阿太个謝春梅先生，佢對一個全臺灣盡後生个醫生變做盡老个醫生，用一生人來守顧苗栗鄉親个健康。

阿梅先生係日本時代出世个，厥爸做佃農畜大一屋家大細，生活纏繃繃。厥奶破病好多年咧，輒輒疾都睡毋落覺，也毋盼得去分先生看。有一日，肚屎疾都耐毋得，正請醫生來看，無想著開个係死亡證明，毋係藥方，這件事對阿梅先生影響當大。因致，小學卒業斯去醫生館跨人學師，經過八年个自學同實際經驗，正通過高考。因為厥爸个一句話，「莊下無先生，愛轉來分大家打幫」，佢斯放撇去大都市發展个機會，轉來故鄉。

正光復該下，交通當毋利便，一接著病人个通知，佢無第二句話，麼个山坑壁見角²，透夜點火油，趕兩三點鐘个路，明明知

病人屋家匱，無定還愛倒墊，阿梅先生也拚緊去，天光正轉到屋家，係已輒个事。該央時大環境當差，病人三股有兩股係用記數，過年前，實在無長著錢來拆數³，斯捉一隻雞來堵數⁴。所以，講著阿梅先生大家都當安謐，一家五代自細看到大，還有第一個接生个嬰兒，這下乜變做厥个好朋友，有在外背做頭路，還會跔跔轉來分阿梅先生看病，厥等講：「哪位都看毋著，看著阿梅先生，病斯好撇一半咧。」

民國三十七年三十暗晡，有三個細人生蛾⁵，送到診所急診，好得閒時有準備，佢遽遽拿貴蔘蔘⁶个馬血清來注，正救著三條寶貴个細命。有恁泥个經驗，阿梅先生長在講：「醫師毋係賺錢，係來救人个！佢斯像便利商店，無放棄全年服務。」有人問佢哪久愛退休？佢講：「做到做毋來正會停。」確實有影，長年透天，無麼个年初一，三光半夜，病人來尋佢，佢定著親身迎接，解除病人个疾苦。

這日暗晡，福基診所傳來一陣紙炮聲，九十九歲个老醫生離開大家咧，照客人个傳統來講，這紙炮係通知隔壁鄰舍，還有送行个意思。行醫一生人，對待病人像自家人个醫德，值得後輩來思念同學習。

¹ 出礮坑：音 chud^ˋ vong^ˇ kang⁺。

² 壁見角：音 biag^ˋ lag^ˋ gog^ˋ；指狹窄偏僻的地方。

³ 拆數：音 cag^ˋ sii^ˋ；還帳。

⁴ 堵數：音 du^ˇ sii^ˋ；抵帳。

⁵ 生蛾：音 sang⁺ ngo^ˇ；喉嚨長白喉。

⁶ 貴蔘蔘：音 gui^ˋ sem⁺ sem⁺；貴得很。

【菜籃擔】林賢峰原作

阿清厥姆兩年前過身咧，上禮拜日下晝頭佢整理老相片，裡肚有兩張竹笕老屋還過棚盛¹頂个一副菜籃擔，接目該下一幕幕像影片个情景同阿姆講過个話語，在厥腦膈肚一遍過一遍湧起來，恁著老哀，一下那等厥目汁嘎溼透兩粒目珠。

阿清厥姆，熟事个全喊佢「阿甜」，厥頭前有兩個阿姊，本成係有錢人个妹，因致厥姆連降三個妹，在該愛俵傳香火个年代，出世言四個月斯分鄰舍捕去做細心白，正經隔一夜忒等，天差地遠。

阿甜自細斯即靈又巧神，人講麼个佢一踢三通，學麼个兩到斯會。厥手當巧，屋家還言分開該下，厥家官所有愛記數个全倚恃佢；原旦屋家經濟還使得，臨尾因致鬪謀毋著，了到貼貼，變做當落喪²。分家厥這葩³分著个，係兩間茅寮過五分三七五保留地。

阿甜身下有三男三女，係講單淨靠保留田該搭出益，怕二冬

禾割撒言過年，米缸斯斷粒米咧。為著畜飽一陣大細並改善家庭經濟，佢想，除了治理⁴原旦該份田之外，定著愛尋兜錢水較生个頭路正使得。

該當時單淨有種燥，種兜經濟作物，有可能搵得出空；兩公姐認真學習種燥个各種知識同訣。連等幾下年佢賸田種个番茄、高麗菜、包心白……等，全都收成真好，銷路好兼價數靚，恁泥个光景連續好多年。兩公姐省省儉儉，幾年落來，緊凝緊有，緊長緊多，正有後來个場面，底氣緊來緊穩，起屋、繳子女讀書，項項順勢。

正起勢該幾年，屋家言有鐵馬，種燥，除了大出成半到會有販來割以外，斯看阿甜逐日一擔一擔揸去市場零星賣，賣毋撒个還愛滿莊迴⁵，這兜全靠佢堅心同耐心，手腳溜掠還過該副菜籃擔。

一張張相片肚留核阿甜辛苦个影跡同理家會除會算，該斯分佢揸出一搭透底个屋地，揸出一楨六目深个竹笕屋，揸出六個子女个學費，揸出一千擔看毋出算毋著个所費，揸出一屋家人个生活同希望。

暗昏燈微个書房——肅恬，壁項時鐘个晃砵——無聲，阿清踅核相片轉到五十年前，佢輕手輕腳行入竹笕屋第四目阿姆个間房，佢想偷偷看阿姆睡言！偷偷看阿姆肩頭該紅退言！

¹ 棚盛：音 pang^ˇ shin^ˋ；舊時廂房內兩壁半空間嵌入橫樑構成簡易置物架。

² 當落喪：音 dong⁺ log^ˋ song^ˋ；十分落魄潦倒。

³ 這葩：音 lia^ˆ pa^ˆ；家族這一支系。

⁴ 治理：音 zii⁺ li⁺；處理大小事務。

⁵ 滿莊迴：音 man⁺ zong⁺ fui⁺；沿著街巷村莊聚落一路兜售。

110 年全國語文競賽客家語朗讀文章社會組（大埔腔）

編號 10 號

【莊下貴貴個人情味】李秉璋原作

「阿伯，借問下去橋頭新吉莊愛仰脣行？」，一個老阿伯當熱心講「對這位直直去，過第二個岔路倒幹，行到莊頭正過問人，人斯會同你報路。」這斯係僱高中畢業了後，第一回自家騎奧多拜去同學屋家个經驗。阿姆講「路生在嘴項」毋知路斯愛好禮問人，自然斯會尋著。尤其係在莊下，無指示地圖，逐條路又過彎彎幹幹，東西南北，毋知騎到哪位？這時節斯愛靠好嘴碼同人問路。莊下人做下真熱心會替你指路，成半下，驚你尋無，還已好心同你帶到位。這斯係莊下貴貴個人情味。

戴伙房屋不時都有人送來無共款个菜，分吾屋家省已多菜錢。這兜做下係屋邊鄰舍、親戚送个。在莊下，大家收入少，為著省菜錢，在田頭做下會留一角地種兜菜自家食。像韭菜、薤菜、石菜、苦蕒，溝面搭一個瓜棚種菜瓜，溝肚種茭白筍，屋頂遞黃瓜、冬瓜這兜。若食毋去，逐儕斯會送來送去。雖然自家無種恁多種，毋過也不時會食著無共樣个菜。頭擺个人還會搨蒔田、割禾、搨種瓜、摘瓜、搨割菜。大家無計較，哪個伙房生活較毋得過，大家雖然毋係已好額，也會盡量幫搨。這斯係莊下人

个良善同熱心，這兜做下係臺灣盡寶貴个東西。

僱讀高中个時，莊項識有人个稗棚著火燒，也有人火燒屋，這時節，毋使人喊，毋使人拜託，歸莊个人有人擲水桶、有人背戽桶、有人牽水筧、有人擎鐵耙，大家共下來救火。等到消防車來个時，火早都分人打撇咧。甚至在該個偷牽鐵牛个年代，莊肚个放送頭一喝有賊入莊，逐個伙房做下會派人出來，擎擔竿、畚剷¹、手電火組隊巡莊，保護莊內个平安。

莊項有人鬧熱討心白，愛辦桌，屋邊鄰舍做下來相幫相搨，搭布篷、借八仙桌、長凳、排桌。前一暗晡，鄰舍、親戚帶帶來食暗餐，大家歡歡喜喜食飯打嘴鼓，細人也暢都從來從去，歡喜轟天。講著新郎同新娘係麼人紹介个，仰脣相行个，逐儕斯像係辦自家个喜事恁歡喜。這兜點點滴滴做下留在大家个心肝肚，牽起大家貴貴個人情味。

¹ 畚剷：音 bun` ciam^；一種用來插送堆肥或雜草的四齒農具。

110 年全國語文競賽客家語朗讀文章社會組（大埔腔）

編號 11 號

【金燕姊个酸柑茶】徐銀珍原作

大家都阿謔金燕姊當會做酸柑茶，佢做酸柑茶源自客人愛物惜物个天性，也斯係近幾年當紅个養生保健聖品，也係臺灣特有、唯一个「緊壓茶¹」。佢講頭擺厥爸當會用柚做柚茶。講著"柚茶"，無幾多人會做，多工又愛有耐心，講正經，打淨撐茶葉、放中藥、纏索纏纏纏，斯已罈囩²咧！佢知恁多工，本成無想愛學，兄弟也無學著。長在看厥爸同一粒一粒个柚茶，吊在煙囪笕項焙去烏疏疏，也毋知焙幾久，晒幾久。

柚茶做好，毋識將佢準茶水食。等到細啞考試進前，愛拚命讀書咧，無論堵著麼个頭燒額疾，人毋鬆爽，嘴毋韌食毋落飯，到這下厥爸正會焮柚茶分佢食，放有十外年个柚茶，咁起來酸甜、酸甜。沖雞卵茶也己好食，先將一粒卵敲入飯碗肚，用一雙筷打散來，放兜烏糖，正同滾滾个柚茶沖落卵碗，緊沖茶緊用筷攙茶水。若係驚無熟，正兜落電鑊炊一下。卵炊忒熟，卵茶个口感斯較澀，較無恁潤喉。卵茶食嗽盡見，止嗽化痰，助消化，顧

肺管，當好用哦，咁落去，真遽斯會回復元氣。普通時斯毋盼得食！

金燕姊緊大緊知柚茶係寶！有錢也買毋著！斯像老菜脯共樣，放越久越好！試著這恁好个手藝若無傳落去，斯真打爽！好得佢有老手路老經驗，當直道，無私分享，三十零年前，佢分家時節分著一大布袋老茶米。恁多姊嫂湊核用老茶米入過年砵神桌个虎頭柑來做，逐儕做有二十外粒酸柑茶。

經過炊、晒、焙、砵，九炊九晒个酸柑茶，硬行行愛用刀嫵削做一片一片，無斯用剝豬骨頭个刀嫵剝，若係無力剝，使得用鐵錘、斧頭敲，驚錘散撒，斯用鋸鋸較靚。過了又也愛剝幼、刨幼來，這也算毋聲斯毋聲，一聲斯打爛盞，打幼了用細布袋張緊正焮得出味。

愛記得這算來係緊壓茶，已耐煮，煮過六遍還有味，毋好打爽撒！聽佢講又分恁恁著還細該下識食過个味瑞！

¹ 緊壓茶：音 gin^ˆ ab^ˆ ca^ˇ；為長途運輸和長時間保存方便，將茶「蒸而成團」壓縮乾燥，壓成方磚狀或塊狀，為防止途中變質。酸柑茶是臺灣最具有代表性緊壓茶。

² 罈囩：音 la^ˋ fud^ˋ；夠你做的。

【甜四神湯】李秀鳳原作

記得讀小學個時節，冬節該日放學轉來，阿姆會喊佢搵手將豬腳個毛擱淨來，用滾水焯過，過用菜刀同豬腳皮刮淨了後，放落張滲水個鑊肚炆。差毋多炆點零鐘久蓋掀開，正放入山藥、茯苓、蓮子、芡實¹這四味漢藥材。等蓮子煮綿，歸大鑊香噴噴個豬腳四神湯，斯出桌咧！

炆去酪酪又蓬白個豬腳圈，浸在滌滌又白雪雪個四神湯肚，還錫人食哦，佢同阿哥、老弟三個枵鬼細孬緊看緊吞口涎水。桌項有一碗冰糖，愛食幾甜自家用湯匙舀。看阿奶擎筷咧，三姊妹合合上²斯頭犁犁緊囑。

阿奶總係笑咪咪講：「有錢補嘴空，無錢補鼻空。佢等毋係好額人，共樣愛食四神湯好好補冬，大人正有力頭抵寒，細人正會較快轉骨³。」

「年怕中秋月怕半」，冬節又到咧。恤著頭擺阿姆煮甜四神湯來補冬，佢也遽遽炆一鑊豬腳四神湯，等讀國中個俻、妹轉來

食。麼人知兩姊妹正落嘴，斯咻咻滾講：「仰脣係甜个呢？還得人畏哦！」連老公也額結結講：「你係毋係老咧，目珠花花，糖準做鹽揆⁴落去？」佢聽著火真著問佢：「你敢毋係客人？仰脣毋識食過甜个四神湯？」老公緊拂頭緊啟大氣。

佢佬著甜四神湯係客人个美食，這擺个經驗正知，原來有恁多客人毋識食過，還用疑狐个眼光看佢。佢識問八十外外歲个阿姆：「你煮四神湯仰會落糖呢？」老哀應佢：「阿太、阿奶厥等傳落來个呀！」有人講：「頭擺糖比鹽較貴，補冬定著愛用糖較有功效。」也有人講：「可能係有一個老癩棟愛撮鹽，嘎撮著糖，一食試著味瑞已好，斯恁泥將錯就錯流傳落來。」還有人講：「客家菜分人个印象斯係忒油忒鹹，寒天補冬食兜甜个，正有較特別个味瑞。」

不管別儕仰脣講，甜个四神湯在吾心肝肚，永久係一等好食个客家美食，因為佢因核吾童年盡靚盡甜个回憶，寒天時節，歸屋家人圍緊一鑊燒爇爇个甜四神湯，這種幸福个滋味，用錢也買毋著。

¹ 芡實：音 kiam`shid`；富含大量澱粉及營養素的一種中藥材。

² 合合上：音 heb`heb`shong+；迫不及待。

³ 轉骨：音 zhon`gud`；指小孩發育轉大人的過程。

⁴ 揆：音 rham`；撒。

【熟事个味瑞】張旭英原作

今晡日打早去廟埕運動，正在該練功練到半爛燦等，一陣風吹來，傳來一陣一陣香香个味瑞，仰脣有恁熟事个味瑞啊！玄玄風恁毋著這係麼个香味，因致既經當久無鼻著這熟事个味瑞咧，佢到底係在哪位鼻過啊？

想去想轉分佢恁著這香香个味瑞，原來斯係吾姆還在該下；圓身特殊个香味呀！阿媽既經離開二十外年咧，今晡日鼻著這熟事个香味，分佢恁著吾姆，目汁一下那硬硬斯會跌落來；佢忍緊毋敢流出來，斯驚怕嚇著企在頭前个教練，恁著佢仰脣咧。該吾姆身項特殊个味瑞，正經當久無鼻著咧！

佢胚想頭前个大姊搽个面油應該係同吾姆共樣，一陣一陣个香味，跔風吹到吾這片析來。逐日去運動，見堵著大姊共下練功，斯鼻得著該阿媽个味瑞。也無去求證大姊係用共牌子个面油無？也無分佢知有一個細阿妹，企在厰尸背尾在該目汁含緊想阿媽。

寒天个時節，吾姆洗好身，斯會在面項搽面油，該種面油香个味瑞，係佢自做細人斯鼻到大个，該香味變做吾姆身項特殊

个氣味。阿媽歸日無閒濟借迂迂迴，到洗好身正有閒好坐在鏡臺前搽面油，佢胚想吾姆个心情應該係已歡喜。

有一擺佢識偷偷在鏡臺肚拿出該盒面油來看，外包裝圓圓扁扁；烏黝紅个色目，當記得盒面頂畫有兩尾金龍，蓋搥開來，看得著裡肚蓬白个面油，醞醞个香味斯走出來。直直到佢去學校讀書會認字咧，正知盒面頂寫个係「烏龍」兩隻字。

該央時佢還細，毋知係吾爸買轉來分吾姆搽，抑係好額个阿媽送分吾姆。這下爺哀在天頂做仙，佢也問毋著咧。總知省做个阿媽當毋盼得用，愛到冷颼颼¹个寒天正有拿來搽，雖然省省用，毋過，自從毋識聽佢講毋罅用。

吾恁多姊妹，無人搽該種面油，總嫌該種面油个味瑞忒香又忒油。無定著某一日佢去日本旅行，分佢看著「烏龍」面油，定著會買幾盒轉來，分分吾姊妹一儕一盒，鼻該熟事个香味共下來思念在天頂个阿媽。

¹ 冷颼颼：音 len+ siuˋ siuˋ；淒清寒冷的樣子。

【潑泡籽¹】徐秀英原作

菜園肚个潑泡籽又熟咧，黃色飽滿个子，係烏、蟲在熱天盡好个點心。放畀野个土雞，歸陣在樹頭下歇睏，一看著佢同老妹打開園門，一下那斯膨膨飛²咧。佢同老妹頭臥臥看該快會一棧樓高个樹身，緊恤愛仰脣同佢斫落來，玄玄風恤著，阿姆頭擺做下會喊吾等愛記得背梯。佢同老妹相看緊笑，少撇阿姆个唸唸了後，姊妹儕斯輒輒記得這項跌撇該項。對倉庫尋梯來跋上去，老妹在梯下捉纏又對佢大聲喊：「細義哦！」，佢驚怕毋曉做田事个佢踏滑³橫落來。

做撇兩點零鐘，總算將打去結結个潑泡籽枝極做下鋸落來咧，滄滄有三大布袋，佢同老妹緊看布袋頭那緊大粒，續落來个工程正係正經大棚。佢在家族个 LINE 群組發出求助訊息，做警察个老弟，開店个四姊，出車禍還在休養个二姊，一聽著消息斯趕轉來搵手。

該下晝，吾等恁多姊妹，圍核大腳盆，煞猛同「潑泡籽」一

粒一粒摘落來，等摘好落鑊煮，天色早既經斷烏咧。二姊當記得製作个順序，還過厥腳著傷旨好，喊佢坐指揮官个大位單淨出一張嘴斯好。屋家還留緊个大灶這下也堵好上場，老妹拿草結起火，看著潑泡籽在鑊肚拋拋滾，泡嫻濟借液液⁴咧，四姊斯拿笊撈無斯篩同佢撈起來。二姊攞好鹽水，用大湯匙將潑泡籽舀到張核鹽水个飯碗肚，一湯匙一坭，無一支香个時間，毛蘭項既經疊滄滄一坭一坭像飛碟个潑泡籽，還醬加幾下盞黃泥色目个黃豆豉个潑泡籽，到這下總算煞鼓咧。

潑泡籽係阿姆食朝盡好傍个菜，一坭像豆油碟恁大个「潑泡籽」，煎去赤金赤金，起鑊前過放兜七緣插⁵，傍白飯食，也傍緊厥滿足个笑容。該係盡幸福个朝脣頭，阿姆个笑容同山頂箭來个第一束光，共樣燒暖。佢也已好食這味，煎去金黃个潑泡籽，鼻著斯會流口涎个七緣插香味。食夜个時節，老妹還趕緊煎一大盤潑泡籽兜上桌，噍核該錫人个火爇香，像又看著阿姆个笑容……。

¹ 潑泡籽：音 pad` po+ zi`；破布子。

² 膨膨飛：音 pung` pung` bui+；飛揚。

³ 踏滑：音 tab` piu`；踩空。

⁴ 液液：音 rhe` rhe`；濃稠狀。

⁵ 七緣插：音 cid` rhen` cab`；九層塔。

【壁瓦¹屋】李宜諭原作

佢有一個心肝肚戴核老靈魂个畫家朋友；在厥生命肚，所有行過个腳跡、堵著个人、事、物，都會分佢有已深个感動同感受，佢會想愛用畫筆來「尋」厥等个故事。可比講耕田个阿伯、種菜个伯姆、田坵肚个禾、辣椒、大樹頭抑係會轉撇个老屋……這兜生活裡肚當自然斯接觸得著个東西，做下會錫著厥个注意將厥等畫落來，佢講：逐擺畫圖个時節，斯像在聽一個故事抑係一條歌，係已快樂个事。

有一擺，佢同佢分享一個作品，該係一個荒廢撇个老屋，佢講，這個老屋安做「壁瓦屋」，對一般人來講，係一個無歷史價值个壞屋，毋過，該屋頂下背一系列，排列整齊，釘核壁瓦个壁面，仰脣會恁特別呢？佢遽遽擎畫筆，跔緊心肝肚个感動，一筆一筆將老屋个身影畫落來。

斯係恁泥个緣份，佢開始去尋「壁瓦屋」个故事。原來，早期對大陸來臺灣落腳个先民，做下係搭茅寮來戴，因為當地尋材

料較方便又毋使錢，毋過，恁簡單个屋實在擋毋核大風雨，因致，先民恁著過較好个方式，用硬程又有韌性个竹摒籬²來結壁牆，厥等在黏泥肚加剁綿个禾稈同薯糠，攪勻³了膏上竹篾項，變做竹篾夾泥牆，恁泥毋單淨使得將竹篾个縫膏密，壁牆也會較拄固⁴。慢慢，屋頂个材料也對茅換過菅蓆，了後正換硬度、密度高个瓦，恁泥斯毋驚風搓咧，當然，愛核⁵恁重个屋頂，壁牆斯愛還較拄固正使得，先民斯用薯糠去攪黏泥，做泥磚來結泥磚壁，過同薯糠、糯米、牛屎攪共下，膏上牆面保護泥磚壁。該當時，恁泥个建材係毋係已環保呢！

早期在客家莊，好額人還會較功夫兜，在壁面著一層「壁瓦」，斯係在泥磚壁外背黏一層壁瓦上去，過用竹釘抑係鐵釘固定穩來，這種建築方式，吾等斯安做「吊壁瓦」，有吊壁瓦个屋，毋單淨毋驚風吹、雨涿同日晒，乜有防濕氣个作用哦！這種吊靚靚个壁瓦泥磚屋，斯安做「壁瓦屋」。

² 摒籬：音 bin^ˆ li^ˇ；編製籬片。

³ 攪勻：音 giau⁺ rhun^ˇ；攪拌混和均勻。

⁴ 拄固：音 zhu^ˆ gu[`]；穩固。

⁵ 核：音 kai⁺ hed[`]；承受。

¹ 壁瓦：音 biag^ˆ nga^ˆ；平面長方形瓦，泥胚完成時在中線上方預留一個釘孔，施工時再釘入。

【高接梨】許倩雯原作

春尾，俾梨大出个時節近，耕種人又愛起勢做梨事个準備咧。豐水梨、新興梨、新世紀梨、蜜梨，無共樣个品種，共樣恁甜、多汁。記得頭擺，臺灣原生種个梨哪有恁好食！民國七十年進前，大家食个粗梨安做「橫山梨」，皮貴，肉粗，成半下還會楔牙縫¹。另外還有一種烏梨，比粗梨細加已多又較酸澀，勤儉个婦女家同佢焯過，過再落兜糖落去滷，巧變做細人好食个烏梨糖！

記得滿姑嫁出嫁了个第一年轉妹家，帶一盒新世紀梨轉來做等路。盒一掀開，香香个果子味瑞斯衝出來咧。新世紀梨雖然無粗梨恁大粒，毋過皮像搽過粉个樣，蓬白蓬白，肉像玉个樣恁飽水。咬落去，第一口，脆！第二口，甜！第三口啊，梨汁跔手脛流往下！

等偈大漢咧，嫁到梨个故鄉「東勢」。正知今這下人好食个幼梨，係一種高接梨。「高接」毋係梨个品種，係一種農作个技術！東勢个寒天毋罈冷，幼梨在這位種毋跣來。巧手慧心

个果農進口溫帶梨个花芽，接在粗梨个樹極項，恁泥打出來个幼梨斯安做「高接梨」。

吾家官耕種个梨園在日頭較足个山排，冬節過後，歸家人開始無間接梨紅²。早接驚寒害，慢接驚雨水。接梨紅該下愛先跋上梯頂，將粗梨个極剪撇，正換過接刀壓一個斜空口，楔入削好个溫帶梨紅，過用電火布纏密密，纏纏纏，佢若係接有過斯會開花打子。這接梨紅个動作，手勢愛輕連，正毋會傷著紅，逐年都愛接過新个紅。

等高接梨打出細粒果子，為著提高價值，毋好分烏蠅蜂叨著、烏啄著，也毋好分日頭灸傷，續落來斯愛用紙絡將梨一粒一粒包起來。七月收成个時節，又愛跋上梯頂，將梨一粒一粒剪落來，已費工。好得摘落來个梨，冰在專門冰果子个冰庫肚，兩三個月都毋會壞，使得定定銷。

守顧家官傳落來个梨園，看溫帶梨个梨紅，在橫山梨極項接成功，係毋係斯像客人个命運，在臺灣這坵土地，啐飽³泥水，必芽綻筍。

¹ 楔牙縫：音 siab` nga` pung`；塞牙縫。

² 梨紅：音 li` fung`；帶花芽的梨枝。

³ 啐飽：音 zud` bau`；吸飽。

110 年全國語文競賽客家語朗讀文章社會組（大埔腔）

編號 17 號

【阿媽个雙手】鄧秀鳳原作

自從都毋識想過，對細捕佢、渡佢、牽佢个該雙手，有一日會放撇，斯恁泥看毋著、摸毋著咧。

記得七歲時節，阿媽牽佢去學校讀書，放學轉來捉吾手教佢寫字，還會同佢拼毛辯。佢若在外背分人欺負，佢會遽遽同佢拌目汁，還緊講目汁斯係血毋好恁好噉。

等吾等兄弟姊妹讀國中个時節，阿媽打早斯疏床，同吾這兜準備豐沛个飯包。當晝食飯个時節，同學圍圍拏，緊講仰脣恁香、恁錫人食，害厥等緊吞口涎水，想食都喊毋敢哦！

講著吾姆个手藝，正經係無簡單哦！輒輒灶下無麼个菜，佢去菜園行一掖轉，飯桌頂又係一桌豐沛。過年過節愛打粄，甜粄、發粄、菜頭粄、碗粄、紅龜粄、艾粄、米粽、粄粽、煨粽，阿媽个手像會變奇術个樣，麼个粄都會打，成半下堵著落雨天，阿媽毋使出門去做茶園事，隔壁鄰舍斯會來湊打鬥敘，盡暢个斯係吾等這陣細孺，毋使出門做事，又還會有當多點心好食。

記得有一擺乜係落大兩個朝脣頭，吾哥聽著屋頂霹靂啪啦落雨聲，斯當暢喊講：「還好哦！落雨咧！毋使去茶園做事！」阿

媽在灶下聽著斯大聲應講：「佢若毋煮分若等食啊，看若這兜還會暢無？」

阿媽這雙手正經無簡單，後生時節屋家一千擔事愛做，像畜豬、畜雞，煮飯、洗衫、渡一陣細人，逐日像極樂个樣迷無停，日日都做到兩頭烏。

等吾等慢慢大漢咧，嫁个嫁；討个討，逐儕都有自家个生活，各人有各人个事業、家庭。阿媽个歲數無算老，正七十空歲等。這年過年阿媽行路緊來緊慢，手也緊來緊無力，越來越像「細人」，幾半下當得人惜，有時節又亂講話，搵都吾等好笑又好譴。

雖然係恁泥，毋過吾等兄弟姊妹心肝肚還係想，使得牽核阿媽，同阿媽个手搭纏纏，斯係盡大个幸福。

半夜無胚想，該日係正放暑假个臨暗頭，阿媽正食幾口飯，斯恬恬目密密¹憑緊凳。毋管吾等仰脣喊、仰脣搖，阿媽還係恬恬無應。到這下佢正知，阿媽毋會過轉醒咧，毋會過牽吾个手，同佢講戇話咧，也毋會同佢嘍嘍嘍咧。

¹ 密密：音 mi+ mi+；閉著。

110 年全國語文競賽客家語朗讀文章社會組（大埔腔）

編號 18 號

【一路桂花香】江昀原作

這個季節去跋淺山，歸路都鼻得著桂花香。桂花像米粒个樣細細蕊，生都歸樹極，分靚靚萋頭萋頭个春光，在空氣肚邊開來，鼻著桂花香个味瑞，係幸福同歡喜。毋知麼人恁有心，在這條山路脣種歸排歸排恁大搭个桂花，分偲這兜跋山个人，在烈烈个日頭下，有桂花香好做伴。「玉蘭有風香三里，桂花無風十里香」，雖然無扇撥涼又無風，鼻著桂花香，心肝還係活活開¹，連日頭都試著無恁熱咧。真勞瀝毋熟事个種花人，老時人講：「送花分人手留花香。」大家都愛共下來做送花人正好。

講正講，這下係三月，桂花開到波嫵濟借香歸路，記得在學校學著个桂花係秋天个花，頭擺老屋个桂花也係秋季正會開花，毋知這三月桂花係品種無共樣，抑係老時人講个：「人無照天理，天斯無照甲子？」吾屋脣巷肚人家種在花盆肚个桂花，三月開一擺，十月又開一擺，仰會恁好空呢？算來係二十一世紀个天時同頭擺差當大碼？抑係宇宙氣流亂撇？想去想轉恁無解，看來還係愛盡自家細細个力量，動手做環保救地球正係正確个選擇。

妹一路跔行，嘎恁著佢讀小學時節个事情。吾等歸屋家人共下去南投泰雅渡假村脣項，朋友个大禾埕種當多桂花做籬笆。大阿姊拿一隻面盆，到籬笆該片析摘已多噴香个桂花，入到灶下用水道水沖一下，跔緊斯開始泡茶請吾等啲咧。

該兜桂花實在還香！單淨鼻著桂花香个味瑞，斯試著像食酒醉个樣，錫都吾這兜个目珠、鼻公、嘴、舌嫵、喉嚨頭，還有頭那神經做下昏昏醉醉。大阿姊過用滾水輕輕泡開桂花个体香，過加一屑蜂糖落去，原旦毋好食燒茶个妹，分花香錫都無魂無魄，也曉得愛討幾口來嚐看看。無想著正摘落來萋萋个桂花會有恁醜恁香个味瑞，嘎一口接一口啲幾下杯，停都停毋落來。該日，歸日都試著精神當鬆爽。

下晝同妹共下去便所个時節，試著屙出來个尿都還有桂花香。這係佢同妹共下轉到厥童年真實个場景，共下回憶个感覺當親切。

行到一路桂花香个細路項，也試著腳步特別輕鬆幸福。

¹ 心肝活活開：音 sim+ gon+ vad` vad` koi+；心花朵朵開。

【挑笏】徐秀英原作

在都市生活，想愛有一搭使得種花養草个空間，確實無恁該得。搬來盡尾棧个樓屋，樓頂變做吾个秘密所在，因為平常時，罕得有人會上來。因致，佢在這項種自家中意个花，一頭夜合花、一頭桂花、一頭含笑，還有對老屋接枝个玉蘭花，幾盆細花、萬年青，斯像老屋禾埕尾該角花園翻款過來个樣，這座城市空中花園，對莊下戴慣个佢來講，還正經分佢尋著一屑思念家鄉个安慰。

這恁久个日頭會難人，花草也灼去燥絲絲。該日朝晨趕在上班前，上去樓頂淋花。淋水个時節，發現著逐盆花腳下，都生當多笏草，怕係鳥搶光做媒人婆銜來个。想愛去樓下拿手落又懶，將就空手擲草。無擲無恁死，一無細義，手指公嘎分一支笏刺入去，無摸佢毋會疾，若係摸著刺刺該搭，斯溫溫疾。因為落樓梯了後，愛趕赴車枋，斯毋記得愛挑撇畀。續落來歸日在外背，一無注意斯會揆著該支笏，一日來，緊來緊紅个手指公嘎疾都摸毋得，一轉到屋下斯遽遽尋針來挑笏。

該支笏分腫起來个手指肉包微微，佢拿核針挖啊挖，挖都出

血都還看佢無停動，佢疾去目汁緊跌，又毋敢放勢鼓落去，盡尾監自家牙齒一嚙煞煞挖較深兜，大氣一啟正同笏挑出來。血跔緊笏口滄出來，毋過無之前言挑笏該下恁疾，總算毋使過繼續挖肉賺肉疾咧！該暗晡，屋下人轉來看著吾該肉綻綻个孔口，硬監佢去注破傷風，一支笏个代價傷身又傷褲袋錢啊！分一支幼幼个笏搥歸日，講起來也己冤枉。

其實，經過這擺挑笏个過程，分佢體會著做人做事个態度也係恁泥。記得還細時節，恁多姊妹吵吵鬧鬧，阿姆輒輒斯會講：「偲等屋下無隔夜冤仇哦！」因致，吾等姊妹若係有麼个無爽快，阿姆會監吾等當下斯講開來，佢講：「冤仇無解開斯像心肝頭有笏刺緊，一生人斯難安生¹，若係靠勢問題細細毋去處理，該笏斯會緊來緊撈，到姊妹个感情打壞斯毋赴咧。」恁啊恁！阿姆還正經已有智慧哦！

¹ 安生：音 on+ sen+；心安自在。

【置腹¹】張美容原作

同佢熟事該年，佢七歲、佢八歲。記得入學該日，佢係一個揪緊阿姆衫尾，毋肯入教室个畏事細人；佢係厥奶牽緊，歡歡喜喜跳緊愛入教室个活跳細阿妹。阿姆看著佢，遽遽半拉半搥喊佢跔佢入教室去。斯恁泥同佢熟事，斯恁泥性體全全無共樣个兩個人，嘎變做一生人个好朋友。

吾兩儕个緣分實在深，共下行過毋知頭天²个童年；共下行過多姿多采个青春年華；共下行過風風雨雨个職場生活。生活肚个精彩，共下分享；生活中个艱難，互相安慰。恁多年來，佢毋識離開，佢也毋識行遠，斯像有一個令裡肚講个：「共行共走共向前，相親相愛緊相連；面對日頭企後背，背緊³月光企頭前。」佢斯係日頭、係月光，佢斯係企在厥頭前、後背个影，有佢斯有佢，看著佢斯看得著佢。

佢會文會武，文个會寫、會畫，自細到大參加比賽，逐擺都打有名；武个會改埔園、會種菜，一個擎直筆个退休先生，擎勾

筆也毋會輸人。佢還會做衫、晒鹹淡，吾爸長在阿謔佢係「慶人」，當歡喜佢有佢好做伴。一年、一年過撇，佢佬著自家大漢毋使佢搵手同照顧咧，無想著，過年過節還愛食佢打个版；閒時間節也食佢種个菜，佢長在同佢講：「佢毋識有好分你打幫，顛倒專門批你！」佢總係笑笑無議無論⁴，像阿姊个樣，包容吾个毋壁、寬慰吾个過錯，分佢盡多个倚恃同燒暖。

其實，在吾人生个道路項，逐個階段都有好朋友陪佢行過起起落落，有兜緣分到咧斯行共下，毋過行啊行斯散撇咧；有兜係緣分盡咧，緊行緊行感情斯淡咧，算跣來，該兜朋友斯使得安做吾人生个過路客忒等。有人講：「朋友使得堅持兩年个，值得你珍惜；使得堅持五年个，安做知己；使得留落來二十年个，斯係若後天个親人。」吾兩儕相知相惜、幫幫搵搵六十年，佢使得大大聲講：「佢係吾个置腹，斯像吾个親姊妹！」

¹ 置腹：音 zhi` bug^；推心置腹的知己。

² 毋知頭天：音 m` di+ teu` tien+；糊里糊塗，不明事理的樣子。

³ 背緊：音 ba` gin^；背著。

⁴ 無議無論：音 mo` ngi` mo` lun`；不予計較。

【 擲雞酒 】李秉璋原作

《孟子·離婁¹》講：「不孝有三，無後為大」，自古以來漢人傳統觀念斯係重視一代傳一代，香火个傳承。恁泥文化同話語正有人好傳落去。所以罵人个話裡肚，盡毒个斯係「孤盲絕代²」咒誓別儕絕子絕孫。對自家來講若降著一個嬰兒，斯歡喜轟天，報上報落報都逐儕做下知，還過食滿月紅卵、還神。報喜个方式在臺中東勢係做新丁版，在崙背羅屋莊斯有擲雞酒个風俗。

俗語講「降得過雞酒香，降毋過四埕枋³。」係講頭擺个婦人家降細人个危險性。若堵著難產，連命都會無撇；若係順勢，斯會在月內，同做月个舖娘人補身，用酒同肉落去共下煮斯係當時盡好个補品，所以順帶還神拜伯公，抑係答謝媒人也做下用雞酒。在婦人家有身項个時節，屋下斯愛量早⁴供一、二十隻雞，等順勢降細人了後斯有雞好用。

羅屋莊有百外年擲雞酒个在地文化。逐年正月半辦這個活

動。莊內十二個莊頭，屋下有出新丁个人在正月半個時節，做下會擲一隻刷好个雞公同一罐酒，去爐主屋下拜三界公同參加比雞大隻个比賽，正結婚个公姐也會擲雞酒來拜神明祈求保護。雞拜過了後愛留落來，跔緊斯剝雞煮雞酒分鄉親分享。毋過爐主會將雞頭、雞尾、雞腳、雞翼留跔來分主人擲轉去，還合一罐水同兩粒柑，代表吉利。這雞个四部分，在地人喊做「四點金」。這四點金代表全雞、圓滿个意思，肉請人食，骨頭留分自家，斯像莊下人个樸實，同盡好个菜送人，較媿个留自家食共款。

拜過个雞，磅看麼人个盡重，照頭等、貳等這兜等別來發獎金，著等个人歡喜，鄉親也替佢歡喜。在地人講：「四點金轉，分細人好畜」，雞酒請鄉親大家食，分人「食福食平安」，在艱難个時代係一種送燒暖个人情事。老古人講「好看人剝肉，毋好看人相打」，斯係這意思。擲雞酒个意義係報喜、感恩、分享个文化，也代表香火代代相傳，在今日个臺灣尤其難得。

¹ 離婁：音 li^ˇ leu^ˇ；《孟子》篇名。

² 孤盲絕代：音 go⁺ mo⁺ cied[`] toi[`]；（貶）罵人之語。

³ 四埕枋：音 si[`] de[`] boing⁺；喻棺材板，表示難產等著的就是死亡。

⁴ 量早：音 liong[`] zo[^]；提早。

【白鶴做生日】張捷明原作

節氣个驚蟄正到，打田機个引擎¹聲，打早斯「嘍！嘍！嘍！嘍！」一路行一路唱歌，將恬靜个莊下喊醒，乜喊醒雞公，雞公當見笑，有人比佢還較早跣床，面紅濟借遽遽飛上屋角喊：「哦！哦！哦！日頭好上班囉！」。

這一喊，喊醒東片山个日頭，乜喊醒地泥下个蟲斯草蟻²，這兜蟲目珠擘金一看，正知泥皮、間房、草頭、屋頂，早都分打田機貶去朗朗四散，在泥空肚，單淨看得著白色个天光，嚇都厥等滿哪蹦蹦颯³蓬蓬飛、礮礮舂舂飛上飛下，告知，屋漏偏逢連夜雨，行船又堵對頭風，這時節堵堵白鶴做生日，就近个白鶴，總下互通消息，打早斯來到這堵堵打田个生日舞臺肚，聚總愛開生日舞會，舞會盡重要个係點心，毋使愁無好食，該兜蹦蹦颯蓬蓬飛，礮礮舂舂个蟲斯草蟻，斯係盡好个生日禮物，還會自動颯入白鶴个嘴空肚，厥等單淨跣在打田機後背緊行斯好，斯像雞嫵帶雞子樣，大家牽緊打田機在田坵項跳舞，迂過來迂過去。日頭緊

跋緊高，在闊茫茫一坵一坵个田項，看著一臺一臺个打田機迂過來迂過去，共下畫出大大幅个春耕動畫電影片，繼續看落去，斯會看著春耕、夏耘、秋收、冬藏，還會看著大地富足，人人有飯食个農家樂。

這部電影，係將時間徙到打田機發明之前，用牛犁田个時代，節氣驚蟄正到，天官光狗官吠，煞猛个阿爸打早斯牽一隻水牛落田，駛緊犁耙碌礮，緊「喝！喝！」指揮牛犁田，將韌床⁴个細人喊醒，乜喊醒雞公，雞公當見笑，有人比佢較早跣床，面紅濟借遽遽飛上屋角喊：「哦！哦！哦！日頭好上山哩啲！」白鶴遠遠聽著，斯一陣一陣飛過來過生日，食地泥下个蟲斯草蟻。

早跣个毋單淨阿爸，還有阿姆，阿姆早都煮好飯，還餵好雞鴨，等田肚共下換工做事个阿叔阿伯轉來食點心。阿姆講：「早跣三朝當一工，早跣三年當一冬。」這斯係對頭擺傳到今，煞猛个耕種人好習慣。

老牛時代同鐵牛時代無共樣个係，頭擺个白鶴毋單淨在打田个田肚做生日，在緊工過後，還使得企在牛背囊陪核老牛，看耕種人一粒米一點汗个辛苦，還會看著一代傳一代，堅耐煞猛後个和諧世界。

¹ 引擎：音 en' rhin'；發動機，語源於日語「エンジン」。

² 蟲斯草蟻：音 chung' sii+ co' mag'；泛指各種昆蟲。

³ 蹦蹦颯：音 bang' bang' biau+；到處亂蹦蹦跳。

⁴ 韌床：音 ngiun' cong'；賴床。

【惡手毋當兩】左春香原作

細漢時節，阿姆當會帶緊佢共下做事，順續陪佢打嘴鼓。像洗衫該下，佢會喊佢洗襪、洗底衫該兜細領个，講佢係大人愛洗大領个，還輒輒會阿謔佢恁會恁乖，講麼个「惡手毋當兩」，真好，佢試著較做都已值。

「做麼个愛講惡手呢？麼人恁惡？」佢緊問。

「惡手，毋係講人歪心肝又好起譴。係講做麼个事頭都當慶、當煞手个人，雖然佢單人獨馬斯好勢好勢，毋過若係有兩三個人共下做，有好參詳，有蝦公、老蟹腳來幫搵，斯有可能還較順溜又較有伴啊！」阿姆緊講。

佢知咧！一個家庭乜像一個「團隊」，大家合作互相「讓陣」，該係當好个家庭教育。頭擺屋下有種番薯葉，平常時阿媽斯會喊吾等搵手，吾等也做來慣勢慣勢；係堵著風搓天該下，番薯葉變都當稀罕，大家相爭搶愛買，阿媽、阿姊一個摘一個罽，菜園肚無閒濟借；阿爸、阿哥斯一個載一個撻，佢同老弟在市場脣个電火楯下緊賣緊收錢，也好得兩雙手無交差¹。

¹ 無交差：音 moˋ gauˋ ca+；沒換錯。

人講「水大好行船，人多好做事」，社會係多人共同生活个，一般人毋係單人獨馬過日。朋友之間，係共下做事抑係打球比賽，成半下會打著驚，成半下會起譴，有人使得分享心情，若無「豬」隊友來破壞，斯毋使驚該兜「神」對手；公姐之間，親密程度像嘴脣同牙齒个樣，尤其降細人過後，難免會有齟齬²，連包尿布、泡牛奶、養育觀念該兜个微毛末節，有時節都會堵堵撐撐，鬥毋著榫³。係兩人共心，該力量斯使得斷金。

學習知識乜共樣道理。人講斧頭削自家个柄毋著，一個人學習難免會有自家看毋著个所在，這時節斯毋當幾個人共下學習，魚幫水水幫魚，各人毋曉个使得拿出來大家討論參詳，曉得个使得分享交流，恁泥來學習，自然斯有趣味又合事半功倍。教學也係共樣，先生乜當需要教學理論同經驗个分享討論。尤其這下个教育愛有新个想法同做法，一個人去試可能想毋來，毋比得大家共下討論學習，相幫總比單人獨馬好。較仰脣講逐個人个特長無共樣，「惡手毋當兩」啊！

² 齟齬：音 ngiˋ ngiaˋ；吵架。

³ 鬥毋著榫：音 deuˋ mˋ chogˋ sunˋ；不能謀合。

【失眠】李幸妃原作

做歸日事个日頭，癢凹凹咧，還係起腳走，從緊走轉屋下歇
睏！大地慢慢對一片紅霞變暗變恬靜！暗咧，夜鷹¹還言睡，
「追！追！追²！」，敢係在比賽走相逐？草埔該項毋知名个蟲，
唧！唧！唧！有時大嫵聲躡高音，有時細細聲唱低音，斯像在辦
唱歌比賽。隔壁先生个花貓，偷偷來推吾窗門過家寮，喵！喵！
喵！問佢仰脣還言睡？

有一首詩係恁泥寫个：「春有百花秋有月，夏有涼風冬有
雪，若無閒事掛心頭，便是人間好時節。」係啊！恁好个季節，
外背有涼風吹入來，聽得著竹葉相尖發出沙！沙！沙！个聲，鼻
會著淡淡个桂花香，心肝頭也無麼个好掛心、愛操煩个事情，仰
脣在這恬芍芍、暗摸脣疏个暗晡頭，佢還無想愛睡呢？

輕手輕腳搵開接地窗門，企在陽臺感受同恬靜个夜色融共下
个感覺。遠遠个路燈一葩³一葩光華華，認真負責晝光車路，分暗

轉个人感覺著有人等門个燒暖。臥頭看著高高吊在天頂个月光對
佢微笑，搞怪个星，這瞞該瞞，成半下還同月光打電報、使眼
箭傳情意。這時節，佢嘎恁著細漢時節輒輒會問吾姆：「仰脣星
會瞞啊瞞？月光仰脣無逐日恁光恁圓？仰脣鳥還毋轉……。」吾
姆總會講：「你仰脣會有恁多个仰脣呢？實在無結煞，無問出一
支柄毋睡係無……。」

夜深咧，屋內个鬧鐘滴答滴答，點醒佢正經好去睡咧；若
無，一瞞目雞公啼、天斯愛光咧啊！看著打側睡在吾腳脣个「咪
寶」，佢出聲喊佢好轉去咧！恁暗毋好還在外背打彳亍⁴，屋下人
會掛吊哦！佢像聽得識，對佢喵一聲、西一下手，起躍跳落陽臺
下，黏時在烏疏疏个夜色中毋見撇！風共款輕輕徒步，路燈共樣
恬恬企緊，言知暗夜嘎有恁多人言睡同佢作伴。

失眠个佢，毋會青驚。顛倒分佢感受更深夜靜之時，萬物个
靚同生命力。佢學會換一個角度同心情，去觀察身邊个世界，享
受同日時頭無共个自然節奏。原來失眠也有難得个幸福味瑞。

¹ 夜鷹：音 rha` en+；臺灣夜鷹屬於夜鷹目、夜鷹科，非保育類特有亞種，別名：南
亞夜鷹、林夜鷹、疏林夜鷹、石磯仔。

² 追！追！追！：音 dui+ dui+ dui+；指夜鷹的叫聲。

³ 一葩一葩：音 rhid` pa+ rhid` pa+；一盞盞。

⁴ 打彳亍：音 da` chid` chog`；無所事事閒晃。

110 年全國語文競賽客家語朗讀文章社會組（大埔腔）

編號 25 號

【若愛子平安，三分飢同寒】黃秋枝原作

這係一間，無已重要个科任兼社團教室。

早早入到教室，輒輒愛對徑腳¹个垃圾掃起，緊掃，還過緊拈鉛筆、揸布、尺，下把還有銀角、飯包确同寒天時著个名牌絨毛襖。歸學期落來，該兜東西毋識有學生來尋，幾下擺明知係某某人个東西，喊佢來拿轉去，偏偏十喊九毋來，任在一學期過撇一學期，歸堆等主人來認領个東西，有較多無較少。

年深月久落來，觀察个結果：總講這下个細人生活忒豐湧咧，愛來尋，過買過較遽。有當多擺，當場喊學生拈厥桌凳下正開削个鉛筆，該細人看一下講：「這又毋係吾个！」黏時，用厥腳躡緊鉛筆，播到脫漆，臨尾出力一蹴，將該枝鉛筆舞去必離必絲²，在半做搞英雄式个威風當下，其他个人也試著無半屑唉哉³。

佢無話講！半節課，愛講麼个也毋得！

恁著，頭擺个時節「一粥一飯，當思來處不易；半絲半縷，恒念物力維艱。」鉛筆，輒輒寫到屈尾，也愛想辦法拿竹截裨長

來寫；揸布用到鼻屎恁大坭也還愛用，東西罕得有耗爽⁴抑係跌撇，莫講係一領襖，連一條細手巾也愛留存好勢。

人講：「爛衫好遮羞，爛鼓好救月，爛銅鑼好嚇賊。」養成知福惜福、愛物惜物、節約資源个環保好精神。省儉毋係齧察，省儉係「該省斯省、當用斯用。」現下个細人，食飽著燒無麼个大項下問題，現下个爺哀，錢好賺也好使，學用品旦旦毋係買零星个，輒輒係歸箱歸打買來个，用途無恁大，顛倒耗造⁵撇較多！

見景傷情……「若愛子平安，常帶三分飢與寒。」物質忒充足、利便，多斯係草，橫直毋曉得省做、惜福。笑笑來轉換一下差大碼个心情，有影係「蚊腳比豬髒」，恁想上承天露，下接地氣个頭擺，正經比毋得樵燥米白个今這下人。

¹ 徑腳：音 gang` giog^；比喻東西多且紛亂。

² 必離必絲：音 bid^ li~ bid^ si+；東西破裂分開。

³ 唉哉：音 ai+ zai~；在意或特別的感覺。

⁴ 耗爽：音 ho+ song^；糟蹋浪費。

⁵ 耗造：音 ho+ co~；沒有節制、無益的耗費。